

Minister Junior Croes:

Aruba conose un Libertador y esey ta Betico Croes

ORANJESTAD (AAN): “Durante di rueda di prensa semanal di Gobierno e pregunta a worde haci na mi persona entorno e declaracion di Minister President Henny Eman kende ta di opinion cu ta nan a logra Status Aparte, y cu ta AVP a rescata e lucha pa Status Aparte despues cu mi tata Betico a laga esaki cai cambiando e lucha pa un Aruba Independiente.

Den mi reaccion mi a bisa cu Sr. Henny Eman den mi opinion ta un politico cu a haci hopi pa Aruba y cu mester respete pa esey. Mi kier agrega cu mescos cu tur politico kier pa nan worde respeta pa nan labor, esfuerzo y experiencia, a yega e momento pa e mesun politicianan aki respeta logro di otro. Y den e caso aki mi ta refiriendo especificamente y unicamente na mi tata Betico cu ta esun cu a lideriza e lucha cu a culmina den e logro di Status Aparte pa Aruba. Mi tata hamas a laga e lucha pa Status Aparte cai manera Sr. Eman a expresa.

E unico berdad ta cu e lucha pa Status Aparte a worde transforma pa Independencia despues cu Hulanda na mas di un ocasion a laga sa na Betico cu nan no ta duna Aruba su Status Aparte. Minister President Lubbers di Hulanda a bisa Betico: “Status Aparte kan je op je buik schrijven”. Esey ta ora cu mi tata a bisa Hulanda: bo no por obliga nos keda un colonia den federacion Antiyano. Ta unicamente pa e motibo ey cu Betico expande e lucha di Status Aparte pa Independencia.

Un independencia mara na un fase transitorio unda cu Aruba lo no ta forma parti mas di e constelacion Antiyano. Cu otro palabra den un Status Aparte. Pues ta di unda a nace creencia cu Betico a laga e lucha pa Status Aparte cai te awe mi no por comprende. Mi ta sigur cu Sr. Eman pa e politico experiencia cu e ta, conose strategianan politico y cu den tur honestidad sa cu e lucha pa independencia di Betico tabata pa pone Gobierno di Hulanda bao preshon, pa Betico na caminda por a logra nos Status Aparte. Y Betico a logre cual ningun hende

nunca hamas por kita for di dje.

Di herencia mi tata a siña nos respeta nos historia y respeta tur esnan cu a forma parti di nos historia pasobra historia ta e base pa futuro. Esaki ta grandeza di un gran homber. Ta pa esaki cu ta net su persona a worde escogi pa finalmente logra e libertad di su pueblo pasobra historia ta muestra tambe cu e lucha pa separacion a cuminsa for di añanan 30 pero cu ta Betico a logra Status Aparte na 1983. A yega e momento pa laga skibi e historia real di e lucha pa Status Aparte. Si nos no haci esaki nos lo ta cometiendo un inhusticia contra pais Aruba cu hamas lo haya sa e berdad di su historia. Finalmente mi kier bisa cu mi ta agradecido pa por a nace den e mundo aki como yiu di Betico. Ta pa e motibo aki cu awe nos a escoge como famia pa gara e bandera y caba cu e trabaonan cu e mes no a logra termina, cu ta algo cu ningun hende por kita for di nos tampoco.”